

5. september 2025

UKA 2025/154

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imaattoq matumuuna saqqummiuppara:

Ersinngitsumik innarluutillit atugaat pitsanngorsarniarlugit innersuussutaasut qanoq piviusunngortinneqarsinnaaneri pillugu Inatsisartunut apeqquteqaat aallaavigalugu oqallisissiasatut siunnersuut.

(Inatsisartunut ilaasortaq Knud Kleemann, Atassut)

Piffissanngorpoq ersinngitsumik innarluutillit, soorlu ADHD aamma autisme annertunerusumik politikkikkut ukkatarissallugit. Sivitsorpormi ilaqutaasut, angajoqqaajusullu saaffissaarullutik tusaqqulermata. Qineqqusaarutigiarpagummi, aamma angajoqqaajusut qaqitsiarput iliuuseqartoqaqqullugu. Uagummi qinigaavugut inuiaqatigiinni sanngiitsortagut allallu ikorfartortariaqartut ikiussallugit.

Inuillu innarluutillit atugaat eqqartorneqartillugit ajoraluartumik puigorneqakkajuttartut tassaapput ersinngitsumik innarluutillit. ADHD, autisme, PTSD, puigortunngorneq, naqinnernik ilisarinnissinnaannginneq, isigiarsuttuuneq, tusilartuunerlu assersuutigiinnarlugit, taakkuupput ersinngitsumik innarluutitut taaneqartartut. Taakkuuppullu ilaatigut puiginnarneqartoortartut.

Tilioq malillugu nunatsinni innuttaasut tallimararterutaat innarluuteqarput. Nunanilu tamalaani innarluutillit pillugit pisinnaatitaaffiit nunatta atsioqataaffiginikuusaa suli inorsarujussuartumik atuutsinniarneqaraluarput. Aali immitsinnut isumassuinissamut pisussaaffilersimagaluarluta arlaannik peqquteqarsimassaaq innersuussutit suli naammassineqarsimannginnerinik. Pingaartumillu ersinngitsumik innarluutillit ukkatarineqanngippallaarlutik.

Uani oqallisissiami siunertaanngilaq ersinngitsumik innarluutillit atugaanni suut pitsanngortissallugit oqariartuutigissallugit, ajornanneqaarmi suut aaqqitassaanersut tikkuassallugit. Oqallisissiamilu siunertaavoq taakku aaqqiissutissat qanoq piviusunngortinniarneqassanersut.

Massakkut Inatsisartoqatikka apererusuppassi. Qanoruna iliorutta ersinngitsumik innarluutillit atugaat pitsanngortinniarigut? Inoqatitsinnut ikinnerussuteqartunut isiginnittaaserput allanngortinniarparput? Naligiinnerusumik periarfissagissaarnerusumillu sullinniarutsigit qanoq iliussaagut? Akissaqartikkumavagut? Ersinngitsumik innarluutaasut assigiinngitsut nunatsinni qanoq atugaatiginersut ilisimaneqarpa? Ersinngitsumik innarluutilinnut aaqqiissutissatut innersuussutaasut

amigarsimappat? Angajoqqaat suliniaqatigiiffiillu massakkumut atukkat pillugit, soorlu ersinngitsumik innarluutillit 25-leereersimasunut neqeroorutit amigaataaqisut pillugit qanoq tusaanerusinnaavagut? Suliniutit solsikkesoritut ittut qanoq siuarsarumavagut? Piviusunngortitsisariaqalerpugummi.

Allaat nunatsinni ilinniartitaanikkut appasippallaamik inissisimanitsinnut ilai apeqqutaaqataasimasinnaappat? Politikkikkut tulleriiaarinermi salliullugit ukkatariumavagut? Maani inersuarmi piumassuseq qanoq annertutigiva? Atassummiit suleqatiserinnilluta una qaqillugu oqallilluarnissamik kissaateqarluta qujavugut.